

TE HAHUURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 3.

Mati 1929.

Mat. 23.

“Inaha, o te mea maere e te taa ê hoi te mau ohipa a te Fa-
tu ra. Te mea tia ore ia imi e te hohonu o te parau moe
na'na ra e, e aore roa e tia i te taata ia imi papu i ta'na atoa
ra mau ravea. Aita hoi e taata tei ite i ta'na mau haerea,
maori râ ia heheuhia mai ia ia'na ra; e tena na, e au mau
taeae, eiaha outou e vahavaha i te mau parau heheu a te Atua
ra.” B. a M. Iakoba 4:8.

Te Faaroo no te Feia Mo'a Mau.

Ua iritihia teie nei parau na roto mai i te buka: “Te Hiro'a Faaroo”
tei papaihia e Tamate Aposetolo; Faaauhia ei reo Tahiti e Elita.

HIRO'A FAAROO 8. * * * *E te faaroo atoa nei hoi
matou e, e te Buka a Moromona ra, o te parau mau ia a te
Atua.*

(E tuatiraa teie nei parau.)

UIRAA 5. **E MEA NAHEA** te iritiraahia mai o taua
buka ra?

P. Ua ravehia te reira na roto i te mana o te Atua e
na roto i te horoaraa i te beheuraa. E ere te reira te ohipa
na te taata no te mea aita Iosepha i haapiihia i te Reó Ai-
pliti i taua taime ra. I te taime Iosepha i farii ai i te mau
api auro, ua farii atoa oia i te hoé paruru ouma e te Urima

e te Tumina (o te tahi mea te reira mai te titea mata nei te hurn). Ua hió atura Iosepha i te parau i ootihia na roto i te Urima e te Tumina e ua faaite oia i te auraa i te reó Baratane i te taata papai parau.

Parau Tauturu: I te haamataraa i ta'na iritiraa ua papai Iosepha i te tahi hohoá no te parau i ootihia e te auraa i te reó Baratane. Ua afai atu o Maratini Harise i taua mau parau ra i te hoé taata haapiihia i te Reó Aiphiti, o Tiare Anatone te i'oa, na'na i taió. Ua na ô maira oia ia Maratini e, ua tia te iritiraa i taua mau parau nei e mai te mea e afai mai oe i te reira buka ia'u e faaoti au i te iritiraa. A faaroo ai râ oia e, ua piahia te hoé paé o taua buka ra, mai te ite ore ua faaí oia i te tohu a Isaia, tei papaihia i roto i te Isaia 29:11-15 a parau mai ai oia e, "Aita e tia ia'u ia taio i tei piahia."

Uiraa 6. Eaha te huru o te tuuraa i te mau buka i roto i te Buka a Moromona?

P. Tei roto i taua buka nei e 15 buka ra i parau-noahia i roto i te i'oa no te feia i papai. No roto mai na buka e ono matamua i te mau api nainai o Nephi ra, e to ratou mau i'oa o te I Nephi, e te II Nephi, e te Iakoba, e te Enosa, e te Iaroma, e te Omoni ia. E mai te buka a Mosia e tae roa'tu i te pene hitu no te Buka a Moromona ia te iritiraa no roto i te haapotoraa i te mau api rahi a Nephi. Mai te pene vau e tae roa'tu i te hopea, o te parau ia a Moroni e to'na haapotoraa i te parau no te Ati Iareda o tei parauhia i te Buka a Etera.

Uiraa 7. Ua faaite-mau-hia anei te Buka a Moromona?

P. E, ua faaite-papu-hia te reira na roto i te vaha no na taata tootoru na mua, e na muri ua faaite faahou mai na taata too vau i ta ratou parau faaite no te mea ta ratou i ite.

E Parau Faaite a na Ite Tootoru: Ia ite to te mau

fenua atoa, e te mau nunaa atoa, e te mau reó atoa, e te mau opu atoa e taehia i teie nei buka e, ua ite matou, na roto i te maitai o te Atua ra, o te Metua, e o to tatou Fatu ra o Iesu Mesia, i te mau api no reira mai teie nei papaa parau, o te papaa parau ia no te ati Nephi, e no te ati Lamana, to ratou mau taeae, e no te mau taata hoi o Iareda ra, o te haere mai mai te pare maira o tei parauhia ra; e ua ite atoa hoi matou e, ua iritihia teie nei parau e te horoa e te mana o te Atua ra, no te mea ua faaite mai oia i te reira ia matou i to'na reó; e no reira i ite papu ai matou e, e parau mau ia ta teie nei buka. E te faaite atoa'tu nei matou e, ua ite matou i te mau parau i ootihia i nia iho i te mau api ra; e ua faaitehia mai ia matou e te mana o te Atua, e ere ia te mana o te taata. E te faaite atu nei matou ma te parau mau e, i fâ maira te hoé melahi a te Atua no te raí mai, e ua hopoi maira, e ua tuu maira hoi oia i taua mau api ra i mua ihora i to matou mata; e ua ite matou i taua mau api ra, e te mau parau i ootihia i nia ihora; e ua ite hoi matou e, na roto i te maitai o te Atua, te Metua ra, e no to tatou Fatu ra, no Iesu Mesia, i ite ai matou e te faaite atu nei hoi e, e parau mau ia teie mau mea nei; e mea maere hoi ia ia matou, area ua faaue maira te reó o te Atua ia faaite atu matou i teie parau nei: e teie nei, ia haapao matou i te mau faaue a te Atua ra, te faaite atu nei matou i teie mau mea. E ua ite papu matou e, mai te mea e haapao matou i ta te Mesia ra, e mâ to matou ahu i te toto o te mau taata atoa ra, e e tia hoi i mua i te haavaraa a te Mesia ma te porao ore, e e parahi i pihaiho ia'na i te raí ra e a muri noa'tu. E i te Metua, e i te Tamaiti, e i te Varua Maitai, hoé roa ia Atua, te hinuhinu. Amene.

Oliver Cowdery,
David Whitmer'
Martin Harris.

E Parau Faaite Hoi a na Ite Toovau: Ia ite to te mau fenua atoa, e te mau nunaa atoa, e te mau reó atoa, e te mau opu atoa e taehia i teie nei buka e, na Iosepha Semita, o tei iriti i teie nei parau, i faaite mai ia matou i te mau api i paraubia'enei; e mai te auro ia ia hióhia'tu; ua fafa hoi to matou iho rima i te mau api atoa i iritihia e taua taata ra, e Semita; e ua ite hoi matou i te mau parau i ootihia i nia iho; ua au te reira i te ohipa tahito e te huru ê hoi. Te faaite atu nei matou i teie nei parau ma te parau mau, na Semita te mau api i faaite mai ia matou, ua fafa e ua faito rima hoi matou i taua mau api ra, e te ite papu nei matou e, tei taua taata ra, o Semita, taua mau api ta matou e parau nei. Te tuu atu nei matou i to matou mau i'oa i to te ao nei, ei faaite i to te ao nei i ta matou i hió ra; e aore ia matou i haavare, o te Atua hoi tei ite.

Christian Whitmer,	Hiram Page,
Jacob Whitmer,	Joseph Smith, Sen ,
Peter Whitmer, Jun.,	Hyrum Smith
John Whitmer,	Samuel H. Smith

(Tuatihia teie nei parau.)

Te Fafau a te Atua i Ta'na Mau Taata ra.

UA RIRO TE FENUA PALESTINE EI FENUA API.

E rave rahi te mau parau i teie mau mahana o te faaite mai ia tatou e, i te huru api no te vahi parahi raa tahito no te ati Iuda. No te mea ua faatiamahia te reira fenua no roto mai i te titi e te nunaa Baretani, ua taboéhia te mau Iuda e rave rahi i roto i te hoé pupu no te imiraa i te mau ravea ia maitai to ratou fenua mai tahito ê ra. Te hoí noa nei â to te ati Iuda i to ratou fenua aiá o te fenua i parau-

E tuatihia teie nei parau i te api numera 32

Ta Te Atua Ekaelsia i muri a'e i te mau Aposetolo

I MURI a'é i to Iesu haereraa i nia i te raí, te haapii noa ra i te mau Aposetolo i te taata atoa i te poiri tautau o tei fatata i te mairi i nia iho ia ratou. I roto i ta Paulo aóraa moé-ore-hia i te mau peresibutero no te Ekalesia i Ephesia, e i te taine ta'na i aó atu ia ratou te hió ra ratou i to'na mata no te taine hopea, ua faaite atura Paulo ia ratou i te mau parau ta'na i haapii ia ratou i te matamua. E oti a'é-ra, tuu atura oia i teie parau faaara e te paari rahi: "Ua ite hoi au, ia reva ê atu vau e ô mai ai te uri taehae roa i roto ia outou na, e ore e faahere i te nana. E tia mai hoi te taata i roto ia outou iho, e parau mai i te parau pió, ia peehia ratou e te mau pipi." Ohipa 20:29-30

E taua aposetolo paari nei hoi o tei faaara ia Timoteo i te taivaraa tei fatata mau i te tupu, ua faaite oia ia Timoteo i te mau haapiiraa hape. E e tuuhia mai ia i nia iho i te mau taata o tei pee noa'tu i ta ratou mau haapiiraa haavare ra. Te faaite nei râ Paulo, o tei faaamuhia i te parau no te faaroo, e tei utuutuhia hoi i te mau haapiiraa paari o te Mesia, e faaruehia te parau mau a te Mesia, e te haamori mau a muri atu. "Te parau papu maira râ te varua, e ia tae i te mau tau a muri atu e faarue ai e tahi pae i te faaroo nei, i te faarooraa'tu i te mau varua haavare, e te parau o te mau demoni ra, no te haavare hoi o te feia parau haavare ra, o te feia i pao roa to ratou aau; e te faaore hoi i te faaipoiporaa, e te tahi pae maa ra, eiaha e amu, i ta te Atua hoi i hamani ia amuhia ma te haamaitai e te feia i faaroo, e tei ite i te parau mau ra." I Timoteo 4:1-3

E homa ino ma e, te vai atura te mau parau huru rau tei haapapu i to tatou mau manaó ua taiva mau te Ekalesia. Ta'u râ e ani atu ia outou e te feia atoa o te taió i teie nei parau iti, eiaha outou e faarue noa'tu i teie nei parau fau-

faa rahi mai te feruri-ore-hia, a feruri râ, e a pure i te Atua ma te faaroo, eiaha e feaa, ia ite tatou paatoa e, ua ore mau te Ekalesia a te Mesia i nia i te ao nei, i muri iti aé i to Iesu poheraa.

A parahi ai Paulo i rotopu i to Setalonia ua faaite atura oia ia ratou eiaha ratou e tiaturi i tena na vahi ta ratou e tiaturi ra, oia hoi, e mea fatata roa te tae-piti-raa mai o te Mesia. Te na ô atura Paulo i ta'na haapiiraa'tu ia ratou; "Eiaha roa outou e vare i te taata atoa; o te taiva te tupu na na mua e tae ai i taua mahana ra, e e faaitehia mai hoi taua taata hara ra, o te tamaiti o te pohe; o tei mârô mai e te faateitei roa ia'na iho, i te mau mea atoa i parauhia e, e Atua, e tei haamorihi ra; e ua parahi Atua noa mai oia i roto i te hielô o te Atua, i te faaite-hua-raa mai ia'na iho e e Atua oia." II Tetalonia 2:3-4

Te haapii mai teie nei mau parau ia tatou e, hoé ahuru teie uri taehae roa, e te feia tei faaore i te faaipoiporaa, i taua taata hara ra, o te parahi atua noa mai i roto i te hielô o te Atua, i te faaite-hua-raa ia'na iho e e Atua oia. Area râ taua taata hara ra, e faaitehia mai ia, ei reira tatou e ite papu ai e, ua taiva mau te Ekalesia mai te faa'i te mau parau tohu e rave rahi

Ua ite Ioane pîpî here na roto i te orama i te buru mau no teie nei ao a muri atu; "E na haamori ratou i te teni ra, oia i horoa i te mana no te terio ra; e ua haamori ratou i te terio ra, i te na ôraa e, o vai tei au i te puaa nei? e tia ia vai ia tama'i mai ia'na ra? E vaha tei horoahia mai no taua puaa ra, i te parauraa mai i te parau abaaha e te faaino, e e mana tei ho-mai-hia mai no'na, e ia maha'é ahuru i te rarama e ia piti tiahapa. Ua parau ihora to'na vaha i te parau faaino i te Atua e te faaino i to'na i'oa, e to'na tene e te feia i parahi i nia i te ra'i ra. E i tuuhia'tu ia'na te tama'i mai i te feia moá, e ia pau ratou ia'na, e e mana

te ho-mai-hia mai no'na i te mau opu atoa, e i te mau reó atoa, e i te mau fenua atoa." Apokalupo 13:4-7 Tera ia taua taata hara ra, o tei faaore i te faaipoiporaa, e o te faaauhia mai te uri taehae roa ra, e ua pao hoi to'na aau, ia tia ia'na ia rave i ta'na mau ohipa mai te ite e te haamâ ore.

Aita roa'tu e au ia tatou i te manaó ai e, ua vai noa ra te Ekalesia a Iesu Mesia mai to'na tau e tae roa mai ia tatou nei, no te mea ua tupu iho â te mau parau a te Atua, ua taiva mau te Ekalesia. E ere râ to tatou Atua i te Atua tei ore e aroha mai ia tatou, e ua faaite oia ia Ioane i te mau ohipa te tupu a muri atu, oia hoi, e faahoíbia te evanelia hou rii te tae-piti-raa mai o te Mesia. "Hió atura vanu i te hoé melahi i te maueraa na ropu i te reva nei: ma te evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau reó atoa, e te mau nunaa atoa, i te pii-hua-raa te reó e, a mataú i te Atua, e faahanahana atu ia'na; ua tae hoi i te hora faautuaraa na'na ra; e haamori outou ia'na i tei hamani i te raí e te fenua e te tai, e te mau pape pihaa ra." Apokalupo 14:6-7

No reira, e homa e, ua ore te mana i nia i te taata hara ra, a farii i te mau parau a te Fatu, faarue i to outou mau peú pobe e tomo i roto i te Basileia, o te ore roa ia e mou, e ore roa hoi e riro ia vetahi ê, e hope roa hoi tara mau Basileia i te parari, e e pau e vai tera e a muri noa'tu. Daniela 2:44

—*Papaíhia e Roroma*

E haapuai te mau peapea i te roro mai te ohipa e haapuai i te tino.

Ua hau aé te tatarahapa i te oto anaé no te hara. E riro râ ia te taata ei huru ê o te au i to te ao ra.

hia ra. Te faatia ra ratou i te mau purumu maitai no te pereoo auahi e te mau pereoo uira. E to ratou vahi tapae-raa pahi i te oire Haifa e mea nehenehe roa ia e tei rotopu ia i te mau tapaeraa pahi hau i te maitai o to te ao nei. Te haapii nei ratou i te mau mauhaa api no te mau faaapu ia maitai aé to ratou mau faaapu.

Ua maere tatou, a taió ai tatou e, e piti milioni e tia-hapa afata anani o tei hoohia i te tabi mau fenua ê e te mau taata faaapu no taua fenua ra i te matahiti 1927. Ua hapouo atoa hia te hoé mau afata vine no te fenua Palestine i te fenoa Baretani, e ua au roa hoi te vine i te makete i hina-rohia i ó te oire rahi ra o London. Na teie mau mea paha e faahaamanoá iá tatou i te parau a Isaia i te na ôraa e, “e te ô vine o te Fatu o te Utuafare o Iseraela ia.”

Te afai atoa nei te mau pahi reva i te mau vea i ropu i te mau oire rahi o taua fenua ra, e te vai ra te tapaeraa pahi reva i roto i te oire ra o Gaza, oia hoi, i te vahi i arataihia'i Samasona e te Philitesi, e “ta Iuda i rave” e ta “Pharao i haavî.”

I te matahiti 1927, ua au ia te taihaa o tei haponohia'tu i te reira fenua no te fenua Amerika i te hoé milioni e tia-hapa dara moni Marite. Te rahiraa o te taihaa tei haponohia o te titona, e te faraoa, e te mau pereoo uira ia, e tapao teie no te huru api o taua fenua ra.

Te faatia nei te ati Iuda i te parahiraa no ratou, ia nehenehe ia ratou ia haapii faahou i te ite ta to ratou mau metua i haapii i mutaa ihora. Ua faatia te mau nunaa rahi o te ao nei i te ohipa ta te ati Iuda e rave nei. E te faa-îraa teie i te mau tohuraa o te mau peropheta tahito i te hitia o te râ e te tooa o te râ, e tae noa mai hoi i ta Iesu Mesia iho mau parau.

Ia farii tatou i te parau e, “e ravehia to te Atua” e tia'i

E Tuu te Varua i Roto i te Ohipa

UA FAAROO PINEPINE TATOU i te parau e, "aita o mea i manuia i te ohipa ta'na i rave ra." E i te tabi mau taime ua itehia te reira ati i roto ia tatou iho, oia hoi, aita tatou i manuia i ta tatou mau ohipa. I taua mau taime ra e tupu to tatou mauruuru ore, e te manaó noa ra tatou e, aita e â te hoé i farerei i te ati mai ta tatou i farerei ra.

Ua nehenehe ia tatou ia faariro i ta tatou mau ohipa ei mau ohipa teiaha e te haapeapea, e aore râ ua nehenehe ia tatou ia faariro i te reira ei ohipa mama e te haamauruuru. Ua nehenehe i te ohipa ia faateiha i to te taata eá e aore râ na te reira e faariro ia'na ei taata roo maitai. E faaitehuhia mai te huru o te taata na roto i te hióraa'tu i ta'na mau ohipa, e te huru o to'na varua a rave ai oia i ta'na ra mau ohipa.

Ua na ô maira te Atua e, "e amu oe i to maa ma te hou i nia i to rae." No roto mai i taua parau ra ua tia ia tatou ia manaó e, ta te Atua ia i hinaaro i ta'na ra mau tamarii o te ohipa ia, e aita roa'tu e nehenehe i te taata ia huna i te reira i roto ia'na iho. Ia rave te taata i te ohipa e tia'i.

I reira e tupu mai te piti o te manaó, mai te aha te huru o te ohipa ta tatou e rave, e faariro anei tatou i ta tatou ohipa ei faateihaharaa i to tatou mau eá, e aore râ ei haamauruururaa na tatou? E faaitehia mai, mai te au i te varua ta tatou e tuu i roto i te reira.

E tuu tatou i te varua i roto i te ohipa e na te reira e amui mai i te hoé mau faufaa api i ta tatou mau ohipa, e faarahi te reira i te manaó i nia i te ohipa, e e faaapi hoi te reira i te huru o to tatou raveraa i te reira. A faito tatou i ta tatou mau ohipa mai te varua i roto ra.

Te Mau Parau Apî

I roto i te hiópoaraa a te hoé taote i te huru o to te mau taata oraraa, ua ite oia e, e maoro aé to te vahine oraraa i to te tane. Area râ te na ô atoa maira oia e, e mea maitai aé to te tane oraraa i to te vahine, oia hoi, aita to ratou mau maí i rahi mai to te vahine te huru.

E tamata paha tatou i taua huru ahui nei, oia hoi te ahui metalo. I te fenua Purutia ua itehia te ravea ia faaô te hoé mau huru metalo i roto i te huru rairai roa e ua nehenehe ia hamani i te ahui nehenehe maitai no roto mai i te reira. Na huru metalo i ravehia no teie nei ohipa, o te vea e te auro e te ario ia. Ua parauhia hoi e, e mea maitai roa teie huru ahui no te tau mahanahana, no te mea aita te taata o tei oomo i te reira e veavea ai noa'tu te puai o te mahana. Te na ô atoa maira te parau faaite e, e riro te reira huru ahui ei faito api i te mau fenua papaa i te tau mahanahana i mua nei.

E faahuru ê tatou i to tatou mau manaó no nia i te mau Tinito i te mau matahiti i mua nei. I te mau tau i mairi aénei ua faaroo noa tatou i te mau tamaí e te mau peapea e rave rahi o tei tupu i ó te fenua Tinito i ropu i na pupu rahi i reira. Ua manaó ibora tatou e, ta te Tinito e rave o te tamaí noa ia. I teie nei mahana râ, ua rahi te mau parau o tei faaite mai e, ua tau i te Tinito i ta ratou ohipa tamaí i te ohipa faaapi e i te faanehenehe i to ratou fenua. Te faatia ra ratou i te mau purumu nehenehe, e te haapii ra ratou i to ratou mau tamarii i te mau peu no te mau fenua papaa, e ua huru rau hoi to ratou mau ravea ia haere to ratou fenua i mua.

Ua taradio maira te raatira rahi no te pupu taata tei tere atu i te pae apatoa o te ao nei i nia i na pahi o tei faaitehia i roto i te vea i te avae Ditema i mairi aénei, i te oire Niu Yoka, i te faaiteraa mai e, ua tae ratou i te fenua toetoe roa ra i te pae apatoa i nia i to ratou pahi, o te "City of New York", e ua maitai ratou atoa i reira.

Te vai nei i teie nei te hoé mauhaa himene api, mai te ukulele e te banjo atoa te huru. E tai teie mea mai te banjo te huru e ia oomo i te hoé mea nainai i raro i te mau niu-niu e tai atoa te reira mea mai te ukulele te huru.

E hitu maile i nia i roto i te reva, e aita e nehenehê ia mairi i raro. O te ati teie ta te hoé na taata faatere pahi reva no te nuu Marite i farerei. Ua maue atura raua i taua mahana ra ia haapii i te huru o te fenua e ia nenei hoi te hoé mau hohoa ei tautururaa no te mau taata faatere pahi reva. A faaotihia'i ta raua ohipa i manaóhia ra ua tamata raua i te haa naru i te machine no te pahi reva ia mairi raua i te fenua, no te toetoe râ i te reira vahi teitei, ua piri te mau mauhaa faatere no te pahi reva e aita hoi e nehenehe ia raua ia haamaru i te machine, tamata ihora ia haamairi i te reira i te fenua a tere puai noa'i te machine, aita râ e ravea. Ia maoro rii aéra ua pohe te machine no te toetoe e ua mairi raua i te fenua mai te peapea ore.

Te tupu noa ra te mau mea hitimahuta i ó te fenua papaa. No na matahiti i teie nei ua imi noa te mau taata i te mau mori huru maitai aé i te mori uira ei maramarama no to ratou mau fare. E i teie nei mai ta ratou i hapono atu i te hohoá na roto i te radio mai te hoé fenua e tae noa'tu i te tahi fenua, o tei faaitehia na avae i mairi aénei. Te hapono atoa nei ratou i te maramarama na roto i te radio. E mea api teie nei ohipa, area râ ua nehenehe ia ratou ia

haponu i te mori na roto i te radio no na maire e piti e ua nehenehe i te taata ia taió i te hopea o taua area ra. E ere anei teie te semeio ia tatou nei.

I roto i te tamataraa o te mau uri mutoí i ó te fenua Baretani, ua faaite maira te mau uri i to ratou maramarama rahi. Ua nehenehe hoi ia ratou ia rave mai te hoé tufaa moni paari no roto mai i te hoé puerāa moni huahua a ta-peahia'i te reira i roto i te rima o to ratou mau fatu i te taima poto roa. Aita ratou i farii i te maa tei horoahia ia ratou e te hoé taata ê atu i to ratou iho mau fatu. E ua nehenehe ia ratou ia ite i te taata ofati ture i rotopu i te tiaa taata rahi e e tiaí ia'na ia ore e horo ê atu. E imihia e e itehia te hoé mea e ratou a hunahia'i te reira i na avaé e 300 i te atea.

I te fenua Amerika i roto i te avae Tenuare ua tamatahia te hoé pahi reva, ia mau noa mai te faaea ore e tae roa'tu i te inoraa o te machine e aore râ i te rohirohio na taata toopae i faatere i taua pahi ra. E ua mau noa te reira pahi e hoé hanere pae ahuru aore hora e e maha ahuru ma ono minute, oia hoi e ono mahana e e ono hora e tia-hapa. I reira na tae mai taua pahi reva ra i raro no te mea ua ino to'na machine, aita e â na taata faatere i rohirohi roa. Aita i pau te gasoline no teie pahi reva no te mea na te hoé pahi reva nainai oia i tauturu. A tere noa'i te pahi reva rahi ua mau atura te pahi reva nainai i nia aé ia'na, e ua tuuhia te hoé tuio uaua mai te pahi reva nainai e tae noa'tu i te pahi reva rahi i raro aé. E ua tahe te gasoline mai te pahi reva nainai i roto i te pahi reva rahi, ia faai faahou te farii gasoline no te pahi reva rahi, ia ore te gasoline ia pau.

Alma G. Burton Imprimeur,
Rue Brea et de la rue Dumont d'Urville, Orovini, Papeete